


CELEBRACIÓN EN OS COTOS (na casa)

19 – 20 de setembro do 2020

XXV DO TEMPO ORDINARIO



NON MÁIS
VIOLENCIA
DE XÉNERO



OS COTOS COA IGUALDADE VERDADEIRA DAS PERSOAS,
COS POBOS QUE SOFREN INJUSTIZA E ABANDONO,
COS REFUXIADOS E MARXINADOS DA SOCIEDADE,
COA NATUREZA MALTRATADA
E CON RESPONSABILIDADE PERSOAL ANTE A COVID-19



1.- ENCONTRO EN FAMILIA

SAÚDO DE BENVIDA

🎵 *Amigos nas penas*

Celebrante:

Benvidos sexamos todos a esta celebración. Reunímonos para celebrar a fe en familia, e facémolo no nome do Pai e do Fillo e do Espírito Santo.

Na familia todos imos facendo camiño, e imos tomando conciencia que do mesmo xeito que non todos os camiños son iguais, tampouco, aínda que sexa o mesmo, non todos o andan da mesma maneira. Cada un vai poñendo a súa propia historia, as súas propias forzas ou o seu propio obxectivo á hora de andalo.

O que hoxe se nos propón no evanxeo é coma se Deus nos contratase, como se el só non dera feito o CAMIÑO e nos chamara a nós para que colaboremos con el.

Deus convídanos para axudalo na tarefa da casa e do mundo. Uns fan máis e outros menos, pero coma nos di o evanxeo, Deus non se para a facer contas, o seu amor e o seu espírito repárteo a man chea, teñámolo máis merecido ou menos.

ACTO PENITENCIAL E COMPROMISOS

Celebrante: *Vivir e sentirse cristián é saberse nas mans dun Deus que nos espera porque conta con nós. El non leva contas, El quere convidarnos a que cos nosos feitos, no noso fogar, deamos vida ao REINO. Recoñecendo as nosas comodidades rezamos confiados ao Pai para pedir o seu perdón e comprometermos:*

Monitor/a

➤ Comprometémonos a tratar aos demais dunha maneira máis solidaria e comprensiva como Deus fai con nós?

SÍ, COMPROMETÉMONOS

➤ Comprometémonos a vivir colaborando con todos os que se esforzan por unha sociedade máis xusta e igualitaria?

➤ **SÍ, COMPROMETÉMONOS**

➤ Comprometémonos a non achicar aos demais coma se Deus a nós nos debese máis que a outros?

➤ **SÍ, COMPROMETÉMONOS**

Celebrante: *Deus todopoderoso teña piedade de nós, dos que teñen un lugar nos nosos corazóns, e dos que se senten abandonados, nos conceda o perdón dos pecados e nos leve á vida eterna. Amén.*

ORACIÓN PROPIA DO DÍA

Celebrante: *Confiamos nas mans do Pai a nosa oración presentando no silencio o que rebule no noso interior; lembramos a todas as persoas que, desesperadas, andan a procura dun traballo digno*

(silenzio)

Deus, Noso Pai,
ti fixeches consistir a plenitude da lei
no amor a ti e ao próximo.
Fai que cumpramos os teus mandamentos
e así poidamos chegar á vida eterna.
Pedímoscho polo mesmo Xesucristo,
Noso Señor. Amén

2.- PROCLAMACIÓN DA PALABRA DE DEUS

(sentad@s)

Monitor/a: *A parábola dos contratados para traballar na viña ven ensinarnos que para Deus todas as mans son de proveito. El non para a regatear cando as mans se ofrecen para facer o ben.*

LECTURA DO LIBRO DO PROFETA ISAÍAS

Buscade o Señor mentres se deixa atopar, invocádeo mentres está cerca.

Que o malvado deixe o seu vieiro, e que o home pecador deixe os seus plans, que se volva ao Señor para que teña misericordia del, que se volva ao noso Deus que ¡tanto engrandece ao perdoar!

Pois si, os meus plans non son os vossos plans, nin os vossos vieiros son os meus vieiros -é o Señor quen fala-. ¡Canto máis altos son os ceos cá terra! Así son máis altos os meus plans cós vossos plans, e os meus vieiros do que os vossos vieiros.

Palabra do Señor

♪ *nº 7 Andarei na presenza do Señor* SALMO

(en pé) Leccionario I A páx 254 Mt 20, 1-16 EVANXEO

PROCLAMACIÓN DO SANTO EVANXEO SEGUNDO MATEO

Daquela díxolle Xesús aos seus discípulos esta parábola:

O Reino dos Ceos parecece a un propietario que saíu pola mañá cedo a contratar xornaleiros para a súa viña. Axustou con eles o xornal dun denario e mandounos á súa viña.

Saíu outra vez á media mañá e atopou outros sen traballo na praza. E díxolles:

- Ide vós tamén á miña viña, e dareivos o xusto.

Eles foron. De novo saíu polo mediodía, e pola tarde, facendo o mesmo. Pero aínda volveu saír á tardiña, e atopando outros parados na rúa, díxolles:

- Pero, que facedes aquí, todo o día sen traballar?

Eles responderon: - É que ninguén nos contratou.

El díxolles entón: - Ide vós tamén á miña viña.

Anoitecendo xa, díxolle o dono da viña ao administrador:

-Chama os xornaleiros e págalle o xornal: empézasme polos últimos e acabas polos primeiros.

Chegan os da derradeira hora e dálles un denario a cada un. Cando chegaron os primeiros coidaron que lles darían máis, pero tamén recibiron cadanseu denario. Ao recibilo, murmuraban contra o propietario:

-Eses, os derradeiros, traballaron unha hora só e trátalos igual ca nós, que aturamos o peso e a caloraza do día.

Pero el replicoulle a un deles:

-Amigo, non che fago ningunha inxustiza. Non axustamos un denario? Pois colle o teu, e vaite. E logo, se quero darlle ao último igual ca a ti, non teño dereito a facer o que quero co que é meu? Ou é que ti ves con mal ollo que eu sexa bo?

Así, dese mesmo xeito, os últimos serán os primeiros.

Palabra do Señor

(sentad@s) gardamos uns instantes de silencio para acoller a palabra no corazón



TODAS AS MANS SON NECESARIAS,
TODAS AS MANS VALEN A PENA



(en pé) **PROFESIÓN DA FE**
Celebrante: *Neste encontro familiar, querendo ser crentes e cribles, damos razón da nosa fe:*
Creo, Señor, pero aumenta a miña fe

Monitor/a

Crede en Deus Pai e Nai, que nos creou á súa imaxe enchéndonos de amor, e que pon nas nosas mans o coidado da terra?

Creo, Señor, pero aumenta a miña fe

Crede en Xesús, que nos convida a ser vida para os demais, que nos alenta a camiñar sen medos e sendo coherentes co evanxeo?

Creo, Señor, pero aumenta a miña fe

Crede no Espírito de Deus, que se fai realidade no noso corazón e que nos alenta a colaborar construíndo un mundo máis xusto e no que todos conten?

Creo, Señor, pero aumenta a miña fe

Crede na igrexa, comunidade que necesita das nosas mans, dos nosos traballos, das nosas loitas polos máis empobrecidos, para sermos Igrexa de verdade?

Creo, Señor, pero aumenta a miña fe

ORACIÓN UNIVERSAL

Celebrante: *Movidos pola fe, hoxe, dende a nosa casa, queremos rezar polos homes e mulleres que están necesitados de atención e acollida, e facémolo dicindo:*

Señor, acolle ao teu pobo

Monitor/a

1. Que todas as persoas que formamos a igrexa, coa nosa verdade no corazón e nos feitos, colaborem con todos para facer unha sociedade máis xusta e feliz, oremos
2. Que todos os que están no paro poidan chegar a ter traballo e a gozar dunha vida máis solidaria, oremos
3. Que todos os que traballan ao xornal ou en traballos humildes e pouco valorados, sexan tratados, polo menos, con xustiza, oremos
4. Que se traballe por un reparto mellor da riqueza no mundo, para que os pobos atrasados e miserentos poidan erguer a cabeza con dignidade, oremos
5. Que as persoas que teñen a responsabilidade de gobernar, non pechen os ollos ante as situacións inxustas que hai hoxe no mercado laboral, oremos

Celebrante: *Grazas Señor porque sabemos que sempre acolles as nosas preocupacións e desexos se chos pedimos con fe a Ti que vives e reinas por sempre eternamente. Amén.*

3.- OS SIGNOS DA COMUÑÓN CON DEUS EN FAMILIA

NOSO PAI

Celebrante: *Entremos no corazón do Deus que é Pai. Rezando coa oración de Xesús digámoslle, convencidos, que pode contar coas nosas mans para facer crible o REINO. Así rezamos dicindo:*

NOSO PAI ...

SIGNO DA PAZ

Celebrante: *Sen dignidade non hai paz. Esquezamos todo aquilo que leva a aproveitarnos dos demais. Poñamos en valor todas e cada unha desas mans que nos fan a vida máis digna. Poñamos tamén as nosas mans para a procura dunha humanidade que se asente na responsabilidade persoal.*

NON COMULGAMOS

PERO ESTAMOS EN COMUÑÓN

Celebrante: *A vida compartida do Señor lémbra-nos que os camiños de Deus son de misericordia, solidariedade, perdón, paz... gratuidade.*

Nesta andaina estamos agora convidados a coller forzas compartindo a experiencia do Señor. As nosas mans queremos que sexan as súas.

 ***Na tardiña baixa da vida***

4.- AVISOS E DESPEDIDA

ORACIÓN FINAL

Celebrante:

Oremos:

Señor, dámosche as grazas porque hoxe, como familia, podemos compartir a nosa fe. Sostennos sempre coa túa axuda bondadosa, para que se faga realidade na nosa vida a salvación que celebramos no evanxeo de Xesús, o teu fillo benquerido, que vive e reina con nós por sempre eternamente. Amén.

Xesús, a nosa beira, espera que deamos exemplo del nas palabras que non calan á hora de loitar polos esquecidos, e, a nosa beira, espera que deamos exemplo del no traballo de cada día.

Que a celebración que agora rematamos nos dea azos para vivir procurando dignidade e xustiza en todos os traballos e con todos os traballadores, como nos recordou a parábola do evanxeo de hoxe.

Que teñamos un bo día, unha boa semana, e o Señor nos bendiga, † nos garde de todo mal e nos leve ao seu fogar de vida eterna. Amén.



**“Non vexas con malos ollos que eu queira ser bo”
Palabras de Xesús no evanxeo de hoxe.**